



PERSEVERA

Un página di kurashámentu i çuia spiritual pa miembronan di Scouting Antiano

Mei 2014

Edishon

Aña 4



Ningun profesia di Santa Skritura, no por keda interpretá riba kuenta personal

E promé Papa, San Pedro ta bisa: "Mas ku tur kos, sa ku ningun hende no mag splika niun profesia di Santa Skritura manera e ke. Pasobra nunca e profetanan no a papia loke tabata bini di hende, pero nan tabata hendenan move pa Spiritu Santu ku a papia e mensahe ku tabata bini di Dios." (2 Pedro 1,20-21)

Di kon Pedro ta bin ku e advertensia aki? Di biaha San Pedro ta duna nos un splikashon: "Meskos ku tabatin profeta falsu den e pueblo di Israèl, asina tambe siñadó falsu lo lanta entre boso. Pushi pushi nan lo laga siñansanan ku ta destruí bida di hende infiltrá meimei di boso" (2 Pedro 2,1)



E promé Papa ta sigui yama atenshon di tur fielnan kristian riba e nesidad di deskubrí e berdadero sentido di e Palabra di Dios. E ta bisa: "Den tur su kartanan el a papia ku boso tokante e puntonan aki, ounke

tin algun kos poko difísil den su kartanan. Hendenan ignorante i débil den fe ta trose e kosnan aki, meskos ku nan ta trose otro partinan di Skritura i asina nan ta hinka nan mes den perdishon." (2 Pedro 3,16)

E sitanan ku nos a menshoná mas ariba ta forma parti di Sagrada Skritura. Esei ke mèn ku ta Spiritu Santu mes ta papia pa medio di San Pedro i E ta pone nos dilanti dos puntonan mashá importante ku nos mester tuma sèmper na kuenta.

1. Sèmper lo tin profetanan falsu ku ta distorshoná e bèrdad i interpretá Sagrada Skritura di un forma inkorekto.
2. Sagrada Skritura no por keda interpretá pa kada hende manera e ke.

Tin mester di magisterio di Iglesia, e magisterio di e persona na kende Hesus mes a primintí e karisma di bèrdad, di **uni i**

lòs loke tabata uní... di pastoreá (guia) su pueblo... i konfirm'é den fe.

Hesus mes a sigurá un asistensia dibino speshal na Pedro i su susesoran pa Su Iglesia no pèrdè Su Spiritu. Meskos ku nos ta aseptá Sagrada Skritura (Beibel) asina tambe nos mester aseptá Magisterio di Iglesia.

Loke Beibel ta bisa di Mamanan

- **Gen. 3:20** "Adam a yama su kasa Eva, pasombra el a bira mama di tur bida humano".
- **Eks. 20:12** "Honra bo tata i bo mama, pa asina bo tin un bida largu den e tera ku Señor, bo Dios a duna bo".
- **Lev. 19:3** "Kada un di boso mester respetá su tata i su mama".
- **Deu. 5:16** "Honra bo tata i bo mama, manera Señor, bo Dios, a ordená bo, pa asina bo tin un bida largu i bai bo bon den e tera ku Señor, bo Dios, ta duna bo".
- **Prov. 10:1** "Un yu hòmbler sabi ta duna su tata legria, un yu hòmbler bobo ta duna su mama ferdrit".
- **Isa. 66:13** "Si, manera un mama ta konsolá su yu, asina Ami tambe lo duna boso konsuelo. Boso lo hañ'é na Herusalèm".
- **Ezek. 16:44** "Herusalèm, si un hende mester a traha un proverbio riba bo, lo el a bisa: Pampuna no sa pari kalbas".
- **Lukas 1:43** "Na kiko mi ta debe e honor ku mama di mi Señor ta bishita mi?".
- **Lukas 2:51** "Hesus a bai Nazaret bek ku nan i E tabata obedesidu na nan. Su mama a warda tur e kosnan aki den su kurason".
- **Huan 19:26-27** "Ora Hesus a mira su mama i su disipel stima pará einan, El a bisa su mama: "Señora, ata bo yu hòmbler!" Despues El a bisa e disipel: "Ata bo mama!" For di e ora ei e disipel a tuma Maria den su kas".

